

淮軍平捻記

淮軍平捻記卷三

同治五年八月十六日捻股衝破汴南衛河堤牆悉竄東  
竄

詔公以兩江總督帶印出省進駐徐州防剿 自夏秋之交河水  
漲盛防河之策未定逆氛擾及曹考一帶至七月初間太  
康睢杞通許等處皆爲捻蹤所至我軍跟剿雖屢獲小勝  
而賊勢仍復蔓延所在饑民裹脅日衆是月杪捻衆擾及  
長葛洧川圖竄東境劉銘傳潘鼎新等軍分防沙河賈魯  
河各汛修築堤牆於八月初告成賊計頗沮十三日張牛

任賴併股屬聚於許禹一帶劉銘傳潘鼎新因汴軍朱仙鎮至汴梁省城黃河汛地長牆工未成先一二日馳至汴梁助修省北濠堤一段十四日劉銘傳回至尉氏潘鼎新回至樊寨十五日逆衆由汴梁左右東竄十六日二鼓大隊直犯豫軍長牆潮擁而至夷塹填濠豫省守軍撫標三營不能敵牆破賊遂東逸時銘軍駐紮朱仙鎮遙望火光漸迤西北知豫軍汛地有警卽令烏爾圖那遜等馬隊向東唐殿魁一軍向北截剿比至而賊已全股渡河烏爾圖那遜馬隊晁渡蹤追至杞縣境內頗有擒獲唐殿魁追至

汴梁城南遇牛逆後股橫擊之截殺馬步賊千餘人餘賊  
向南逃竄是時捻衆大勢東趨不旬日間蔓延荷澤曹縣  
鄆城鉅野一帶乘虛疾走欲渡運河於是曾公檄令劉銘  
傳潘鼎新兩軍追擊曹單濟甯一路江蘇臬司劉秉璋蘇  
松鎮總兵楊鼎勳右江鎮總兵張樹珊等三軍回顧徐州  
韓莊一路時沿運上游開河靳口以北有東軍分防韓莊  
八間有公弟昭慶軍分防兵力皆單捻賊四大股合併爲  
一飄急湍悍運防甚爲喫緊而曾公以積勞致病請假

朝命公攜帶關防馳赴徐州調度湘淮各軍防衛淮徐以東並

與山東巡撫閻公敬銘商辦山東軍務互相策應公乃飛檄南贛鎮總兵王永勝統開字十營由六安渡淮馳赴泗州屯駐並飭道員吳毓芬酌帶華字四營前赴清江暫駐又抽調鄭國榜等魁字兩營總兵吳殿元親兵一營徑赴徐州防堵公於九月初九日由省赴徐是時銘鼎兩軍躡賊至於鄆北梁山鼎軍與賊接戰大勝賊由鄆北折回西竄初四日追抵曹州賊悉其黨抗拒烏合雖衆氣薺多敗擒斬解散數不可紀兩軍遂由考城分進一至杞縣一至睢州初八日銘軍抵睢是日五鼓賊卽由睢州西南逸

九月十二日賊首張總愚任柱賴汶洸分道各竄遂爲東  
西二股世號東捻西捻東捻復回犯運防先是賊以窺  
運河不得逞乃圖決黃河斷流徒涉是日薄河掘堤二十  
餘丈我軍急擊之賊大潰不得合張總愚率股自中牟竄  
許陝經靈閔入秦是爲西捻而任柱賴汶洸一股復由豫  
回竄東境是爲東捻二股自此遂分二十一日東捻股首  
任柱賴汶洸率賊回撲運防勢甚慄悍沿運各軍皆嚴守  
屹然不可壞二十七日銘軍敗賊尾隊於曹州二十八日  
鼎軍敗賊於嘉祥縣奪獲賊騎數十匹生擒賊目宋金庸

時山東肥城縣黃崖山土匪起事東撫調鼎軍往剿二十九日賊在鉅野銘軍與戰於葛店馬隊進抄賊館擒賊數十人奪馬數百匹賊敗南竄十月初一日銘軍及之於馬鞍山口縱橫奮擊生擒二百餘人尾賊悉棄輜重回奔爲各團寨民搜殺殆盡賊前隊排紮不動銘傳分兵三路薄之使劉盛藻當西路唐殿魁當中路而親率黃桂蘭當北路分隊齊進賊亦分股相拒我軍勢盛賊卻追至十餘里賊陣猶聯綴不失次田履安丁汝昌當先率勇衝入賊陣各軍三路兜擊張景春馬隊由後包抄賊衆前卻不得各

鳥獸散自相踐踏死者無數追抵金鄉縣東北又殺賊千餘降馬賊二十三名賊復窺淮徐一帶運河十月初三日公軍抵徐是日賊之大股南趨亦離徐百里公檄調王永勝統開字十一營進紮皖徐交界之雙溝劉士奇統奇字七營進紮運河西岸之舊邳州又添調水師分扼運河上下徐防益密銘鼎軍又躡追而至張樹珊率樹字八營亦奉公命與鼎銘軍會合進逼賊由金鄉竄抵豐縣之肅堰初四日我軍截擊斬獲數十人奪騾馬三十餘匹賊折回魚臺初五日銘軍追至魚臺李家溝初六日又追至金鄉



之羅屯賊先排隊待戰以馬隊抄我輜重張景春吉爾洪額等擊敗之擒斬十餘名初七日乘霧復回竄豐沛初八日銘軍亦折回追及於魚臺賊轉向東北我軍擒斬尾賊百餘名賊首劉光遠朱道等率衆降初九初十日賊由羅屯羊山一帶南竄劉銘傳追至金鄉此時賊在城西方築壘不虞我軍之遽集也十一日五鼓銘傳分兵三路令劉盛藻由城南黃桂蘭劉朝幹由城西分撲賊巢唐殿魁在後接應馬隊由旁抄擊賊出不意大潰擒斬三百餘名獲騾馬輜重無算復追至單縣之雞黍集是日張樹珊由碭

山進軍至豐縣十里外之趙家集薄暮遇敗賊令閃鳳來  
馬隊擊之賊騎遁走僅獲三人十二日追至豐縣西關外  
甯家莊探知大股將至紮營甫定馬賊由西北紛來直逼  
我營樹珊先令閃鳳來在前誘敵午刻令各營分路迎剿  
自率開花礮隊接應賊卻走追至距豐十八里之橫堤賊  
整隊回撲爲開花礮轟斃無數賊勢不支竄縣寨東北其  
前股繞出我軍後遇堤折竄東南官軍返旆躡之馬隊馳  
擊賊始潰遁夜三鼓張樹珊令各營襲賊於豐縣東南十  
餘里之張武樓賊馬步大股麇聚我軍三路齊進賊倉卒奔

逃賴逆僅以身免各營猛追二十餘里收隊時已四鼓計共斃賊千餘人奪騾馬三百餘匹生擒悍賊二百餘人拔出難民無算是時任賴二逆爲我軍截斷任向北竄賴向東南十三日銘軍追至豐縣北四十五里之渠家寨賊適攻寨見我軍至奔入沛縣湖團湖團四面近水公之遣樹字營也卽密授機宜令各軍逼賊入湖團就地勢殲之各軍進逼賊窘突入之公飛檄各軍斷其出路賊狡甚知入死地乘兵勢未厚十五日由新團邊界捨死衝突遂竄回金鄉銘軍遇之於姜家樓整隊迎擊賊從旁路狂奔馬隊

追及之於魚臺舊城小有斬獲十六日賊由程莊南竄銘軍又追及之賊乃分股回繞我後劉銘傳令唐殿魁等西擊任逆劉盛藻等東擊賴逆其馬賊先爲張景春等所敗劉盛藻與戰甫開鎗礮賊遽潰奔我軍奮追斬步賊百餘斃擒首程小貓任逆疾走唐殿魁等跟蹤猛追又鎗斃賊馬二百餘匹斬擒首高尚義並馬賊十餘人賊分兩路南趨十七日銘軍追抵豐縣之龔橋賊由豐北回竄適鼎軍自東而南至翟家莊與賊大股相遇賊方避銘軍之跟追不虞鼎軍之旁出大駭欲走而將士數日始得一當勇氣

百倍衝賊陣爲數處追殺十餘里至張家集任逆在頭隊迎拒賴逆帶花旗步隊在中總兵方有道視花旗所在策馬刺賴汶洸於萬衆之中墮馬徑前擒之餘賊攢矛反刺有道中傷十餘處陣亡賴逆脫走仍由金鄉邊界竄回魚臺東北十八日我軍追及魚臺城北二十餘里賊向西南反奔敗之於羅官屯賊走湖邊清河沿相里集十九日由孫家橋一路進追賊將由唐堽集犯濟甯我軍攔剿賊橫列馬步十餘里乘勢猛撲我軍以曠野無可扼紮乃分各營爲三大陣包輜重其中悉力進戰馬賊分路環包步賊

繼之中我鎗礮三撲三敗自辰至午賊人馬斃者狼籍遍野我軍開花礮八尊礮架已震裂其五且戰且追至徐家店賊步隊漸敗遁馬賊尙踞大莊不動我軍以四營繞後直抄其背賊呼嘯迎敵排鎗擊斃悍賊甚多前後夾攻之乃闕潰由西南奪路狂竄二十二日張樹珊與劉銘傳合軍追至鉅野賊東竄鄆城之武安集二十三日走曹州境之郭明口二十四日我軍追及之賊隊正向北竄驟見兵到復折而南先有馬賊數百竄至濮州境爲官兵橫截擒斬百餘名餘衆悉爲民寨所殲二十五日賊正股由曹州

竄定陶城東之土店劉銘傳與張樹珊等會議以兵落賊  
後不能力挫其鋒必疾馳百里出不意攻之方可奪賊之  
氣遂一日馳抵定陶時夜已二鼓劉盛藻唐殿魁卽由東  
進擊劉銘傳張樹珊山西策應四更後直襲賊館賊知我  
軍至遁不敢抗邊館之賊悉爲我軍殲除賊衆乘暗狂奔  
我軍力追二十六日黎明劉盛藻唐殿魁及之於曹縣孫  
老寨值任牛二逆整隊喘息我軍猛進復棄輜重南走張  
樹珊迫至曹縣遇賴逆繞城南走卽令劉克仁張樹屏等  
率隊進擊劉銘傳亦使黃蘭桂畢乃爾迎頭截之殲斃不

可勝計生擒偽天將朝將燕義等賊會十餘名長髮悍賊數百名獲騾馬器械偽印旗幟無算餘賊復爲民寨截殺逆首賴汶洸僅率數十騎向南遁去餘黨數百名俱棄械乞降劉克仁閃鳳來復追至土岡集擒獲賊首楊大阜餘賊狂竄豫境歸德西南一帶事聞得

吉出力員弁查明彙保陣亡之提督銜記名總兵方有道守備袁正泰千總侯鳳德記保把總劉曰清均優卹如例賊自九月二十日以後復犯東境屢撲運河由梁山南竄金魚豐浦欲犯清淮經我軍往來緊躡每戰必挫計不得逞又盤



旋曹濟前後將及一月始潰逃入豫其所據皆東徐交界之處地勢最爲平曠無險可扼故賊雖窮蹙往往奔走得脫我軍忍饑寒忘勞苦緊躡之日無停趾一月之中先後敗賊二十次使賊衆無可喘息所過民寨咸不及攻黨衆折損其半而運河分守各軍亦堅持不動捻股回竄歸德南至羅山復爲盛軍所敗再竄皖鄂之交自此銘盛各軍遂有入鄂之役

十一月初一日公受

欽差大臣專辦剿匪事宜曾公回兩江總督本任 時曾公以

積勞致病屢請另簡

欽差大臣接辦軍務並開各缺十月二十日奉

上諭曾國藩著賞假一個月在營調理

欽差大臣關防着李鴻章署理公得

旨卽疏陳曰前奉

旨飭令進駐徐州本係總督管轄之地疆吏應辦之防清淮以東  
宿蒙以南如兵力能及臣皆責無旁貸故不敢稍有推諉  
茲復奉

命接署

欽差大臣則凡髮捻所到之區衆人束手之際皆將責望於微臣以臣智術短淺才力薄弱實難勝此艱鉅非敢沽謙抑之虛名拘辭讓之末節揆時揣分戰慄驚怖誠有不能自已於衷者惟恭繹

聖諭因曾國藩積勞致疾重煩

廑念令臣暫時署理爲一時權宜之計若再三堅辭往返耽延既無以仰體

宵旰之憂且令曾國藩病軀候代情誼亦覺歉然展轉焦思惟有仰懇

聖明從容籌議知兵大員督辦剿捻軍務或候會國藩調理就痊  
仍舊辦理俾臣稍安愚拙獲免太戾感戴

高厚曷有既極但就目前有必須豫爲籌度者有不敢豫爲限制  
者謹爲

聖主一一陳之上年九月奉

旨令臣帶兵馳赴河洛臣卽恐一離本任則糧餉軍火均無所出  
當將可慮三大端據實詳細覆陳會國藩本年八月二十  
三日附片奏稱將帥帶兵剿賊非督撫手有理財之權者  
軍餉必不應手係閱歷真切之語年餘以來會國藩在前

督師臣在後籌餉患難與共休戚相關雖士馬未盡飽騰而臣之心力實已交瘁怨謗亦所不辭臣來徐甫踰一月後路糧餉轉運相隔漸遠每恐呼應不靈若再逐賊出境遠駐豫省軍務大局未必遂能有濟而各軍餉需本任公事必多貽誤卽蒙派員接署督篆各有責任各有作爲何能與前敵痛癢相連始終如一若強爭則徒失和衷若隱忍則必分畛域軍需稍有掣肘斯功效全無潰敗立見臣去年摺內固已言之詳且盡矣且臣自問本心於一切榮利素知恬澹若從此脫卸地方事件專意辦賊事機可赴神

智不紛猶可勉力報效若因餉缺而潰亦非

朝廷所以用臣督師望臣成功之意臣從軍十數年稔知軍情利鈍之由其樞紐不在賊之難辦而在糧餉軍火之接濟曾國藩老病侵尋自萌退志臣每諄切懇勸謂若不耐軍事之勞頓卽請回任籌餉坐鎮要區彼總以精力衰憊相謝然亦以剿捻全軍專恃兩江之餉若經理不得其人全局或有震撼與臣再四密商迄無嘉謨可以入告是以不得不賴

朝廷之善爲區處矣今

諭旨並未令人接辦江督與通商要件而詢及應否駐紮豫境臣若至豫省邊界離江寧千餘里離蘇滬千數百里軍儲之調發屬吏之稟承文牘往還動踰匝月未有不遲誤者後路根本重地皆新復之區又多通商口岸設有蠢動更難兼顧臣反覆推究事理務求一是綱領全在得人

皇上若仍令臣兵餉兼籌須以駐紮徐州而止應仍如曾國藩前奏東路稍鬆當回金陵或駐清江力籌餉運乃足以固軍心而維大局捻逆在東則督飭各軍就近兜剿捻若趨豫則體察諸軍之勞逸東路之防務更番酌調跟追前往與

鮑超曾國藩等軍會合夾擊劉銘傳等忠勇奮發臨敵應變均尚可靠臣隨事商籌調度似不致遽有失機若

皇上專責臣以討賊在本境可兼管地方駐別省卽不能兼管地方如不兼管地方軍需當責之何人缺乏當如何處置非一二空言能有實濟此必須豫爲籌度者也至捻逆久成流寇臣軍打仗雖尙得力而馬隊太少不及賊馬之多且悍曾國藩因屢言之臣到徐後審察軍情可以勝賊而尙不足以滅賊蓋賊敗後馬隊急走日百餘里我軍步隊至速日七十八里賊隨地撈糧我軍須齎糧而行現各軍略



置車駝齎糧不過旬日旬日之外就地采辦而賊過處人煙荒涼城鄉窮苦往往停留三四日購不出一日之食且餉銀遠道解送亦不應手軍士忍饑趕路催逼太緊恐生潰變我停一日賊走已數百里此剿擒追賊之苦前親王僧格林沁所統馬隊尚多而仍屢蹶不振者職是之由會國藩接手後有鑒於此故始爲設立四鎮旋議扼守運河沙河使地勢收窄賊勢較蹙較易兜剿目下運防水深堤密尚可扼住冬春淺涸尤須加意其賈魯河沙河地段太長人力難齊終辦不成爲今之計自應用謀設間徐圖制

賊或蹙之於山深水複之處棄地以誘其入然後各省之軍合力三四面圍困之或陰扼其饑疲褻脅之衆使其內亂殘殺否則投降免死給資遣回以解散其窮蹙致死之心而披離其黨羽或另有設守致困之法容臣與湘淮各將帥及各省督撫相勢妥籌但能同心協力冀有殲賊之時軍事隨時隨地變幻無常此不敢豫爲限制者也疏入故有是命

十一月二十一日張樹珊追擊賊於德安境軍不利死之劉銘傳敗賊於下沙港任賴捻股窺渡運河不得逞劉

銘傳追逼尤緊逆股東竄無地遂於十月二十三日由鉅野西北奔逃十一月初間銘軍及之於羅山又大敗之賊因竄越固始十四五等日又經皖軍扼剿遂折向西南由商城竄光山繞山而逸周盛波督軍由光州四十里鋪越山追之十六日至白雀園該逆猛竄已過界嶺向湖北麻城逸去周盛波因行糧缺乏暫駐待餉時湖北巡撫曾公國荃駐德安之武勝關安徽巡撫英公翰總兵張得勝等軍分紮六安之流波磴霍山之漫水河黑石渡等處公以捻勢窮蹙湖北黃州各屬毗連皖西潛太英宿一帶皆有險

可扼賊騎不得施展欲令各軍分路併進曾合鄂師設法  
兜截或趁地勢以圖聚殲乃檄直隸提督劉銘傳江蘇臬  
司劉秉璋自周家口拔隊進固始商城與周盛波張樹珊  
分道入鄂由東北兜剿兼屏蔽皖省門戶又慮鄂皖之交  
團寨最少積糧較多賊匪到處可以掠食但能蹙之以兵  
力而不能困之以饑餓而鄂豫交界山徑紛歧此截彼竄  
尤在意中將來賊之出不經隨聚向南陽卽由光羅回汝  
信是豫省南路必須扼紮重兵以備回竄夾擊之用復調  
全軍營務處李昭慶統率南贛鎮總兵王永勝開字十一

營徐州鎮總兵董鳳高馬步七營由陳州周口直進汝寧  
信陽擇要屯駐以防之任賴之由湖陽竄豫也本意自鄧  
浙西趨出荆子關循商洛入秦與張逆合股變爲諸軍所  
挫始折而皖而鄂旬日間奔突千有餘里至是見大軍雲  
集遂由孝感應山雲夢京山踞擾鍾祥之白口一帶賊衆  
以數萬計綿亙數十百里於襄河淤淺處竄越前股擾  
及荆門之石排驛後股尚踞安陸境內張樹珊周盛波由  
應山折赴應城與鄂軍統領郭松林等會剿十一月初一  
日大破賊於安陸之楊家峰賊遂折趨京山天門漢川雲

夢諸處二十一日全股竄近德安距城僅三十里周盛波由雲夢中途折回向德安前進行抵兩河口見隔河胡家店一帶賊衆自北而南周盛波揮軍涉河迎擊是日劉秉璋軍亦至與盛軍左右聯絡進剿馬賊大股衝突我陣經大小炸炮連環轟擊逆皆死拒馬賊稍卻步賊繼進我軍屹立如牆鎗礮抵擊自未至戌鏖戰四時連開炸礮百餘斃賊無數逆衆始潰全股折奔西北是時張樹珊與盛軍東西分進相隔約二十餘里午後至德安之王家灣適任賴牛李大股麇至張樹珊以遊擊日久今得一當乃帶隊

急迫至新家聞見賊屯紮楊家河東岸衆甚盛遂分所部  
六營爲左右甄夾進自督副隊居中馬隊游護其外援桴  
鼓之過河躡賊殺傷無算賊敗潰樹珊督隊窮追賊知我  
戰勝有輕之之意且恃其衆遂分大股抄官軍後路爲困  
獸之反搏我軍力單久戰無繼援前後隊爲賊衝斷陷圍  
中軍勢旣分賊騎愈鴟張各營衝突不得出勢迫遂分軍  
築營壘而親督前敵鏖戰夜三鼓猶未解樹珊所督副隊  
及親兵數百人傷亡殆盡樹珊大呼赴敵殺傷略當力盡墮  
馬賊遂害之樹珊自咸豐四年隨公在皖北帶勇血性忠

篤治軍精強嗣隨剿江浙歷克名都大郡以功洊保至遇  
缺提奏提督右江鎮總兵所統樹字六營與其兄今江蘇  
巡撫張公樹聲會統樹聲以謀勝而樹珊以勇勝故相輔  
而行所向有功至四年春樹聲赴徐海道任樹珊遂專領  
其衆曾公又爲添募步勇兩營馬隊一營轉戰東豫各省  
屢獲大捷所部在淮軍中人數最少然臨敵勇敢馭下有  
恩軍士皆樂爲用故常能以少擊衆公常申戒之謂勇不  
可恃敵不可輕恃勇輕敵敗之幾也然樹珊自以兄弟受  
國家厚恩奮欲圖報常以不得一當爲憾此次援鄂公慮其輕



進迭檄令與盛軍合進乃倉卒遇敵卒以身殉各軍莫不  
愴慟事聞奉

旨照提督陣亡例從優議卹

加恩予諡並於廬州府本籍及立功地方建立專祠其隨同陣亡  
之副將劉登朝郭有容都司馬壽文知縣李輝麟守備黃  
瀚均照原銜優卹並附祀焉是時銘軍亦進抵德安會合  
盛軍跟蹤進躡銘軍於本月二十三日由宋河追賊過山  
賊棄輜重西走京山二十四日劉銘傳親督軍至正值大  
股賊匪繞撲縣城乃派馬隊劉盛瑞等先行引戰步隊繼

進黃桂蘭李錫增等抄出賊旁賊方分股回拒適唐殿魁  
劉盛藻率隊猛擊擒斬三百餘名救出脅從難民千餘賊  
乃遠遁二十七日追至白口賊踞下沙港二十八日任逆  
率馬賊埋伏河邊賴逆步隊排列岡下牛李二逆率衆向  
西佯走欲俟我軍渡河入伏出而包抄銘傳諭知賊情詭  
譎分飭劉朝幹等由河邊迎擊馬賊劉盛藻等逐賴逆親  
率唐殿魁等三路搗賊中堅任逆見我軍先攻其伏知策  
不成卽率馬賊狂奔賴牛各逆亦相率逃去僅斬其尾股  
數十人

同治六年正月十五日劉銘傳與霆軍約攻賊於尹澧河  
失期兵敗銘傳鏖戰復振 五年冬賴牛諸逆之敗於下  
沙港也由宜城之流水溝循襄河上竄銘傳料賊以霆軍  
駐樊城必不敢正走當斜出東竄棗陽正月初一日卽督  
隊趨行抄賊之前賊果出冠山口出銘傳派黃桂蘭等六  
營進擊唐殿魁四營接應劉盛藻繞趨山口斷賊後路賊  
未及防驟見我軍齊進牛逆一股已過山口向西狂奔任  
逆又折回河邊輒亂旂靡望風奔潰我軍逆擊之擒逆酋  
郭包子王信等俘斬千餘人解散脅從無虛數千奪馬匹

器械無算任賴被各軍剿急不敢北竄樊城東竄聚陽復由河西折竄安陸十四日銘軍仍由宜城北路馳抵下洋港謀知賊聚安陸府屬之尹澧河銘傳與鮑超函約次日分道前進霆軍由西而東銘軍由北而南期兩面夾擊十五日辰刻銘軍先至尹澧河望見賊隊均紮對岸遂將輜重約退留王德成龔元友兩營護守銘傳親督隊伍過河進剿賊見我兵過渡卽分馬步兩路馬賊千餘向北包抄步賊繼進欲薄我軍於河陳振邦保成等馬隊及賊陣未合遽迎擊之賊不戰而遁我軍分追五六里賊忽以奇兵

躡我後軍中不知虛實驚報銘傳恐後路力單失輜重乃分前敵步隊三營馬隊三營回顧後路賊見我軍抽隊過河前股亦悉衆回撲我軍未得渡馬隊又驚銘傳乃以十二營分三路迎敵任逆率衆先犯左軍牛逆犯右軍賴李二逆抵拒中軍中右兩軍將戰而任逆驅大股已將左軍全隊包裹劉盛藻鏖戰良久河岸地窄人多不能逞勢將不支銘傳恐左軍有失令黃桂蘭張士元李錫增三營舍賴李兩逆往救左軍行不數武左軍已退過河李錫增見賊追左軍奮往救深入賊中爲鎗子所中歿於陣賊乘勢

進圍中軍任賴牛李併力而至銘傳親督中軍且戰且退  
右軍亦被圍奮擊不得出唐殿魁及營官田履安吳維章  
咸死之軍士歿者六百餘人賊追我軍過河銘傳督王德  
成龔元友等後路之師哭起迎擊適霆軍亦至兩軍齊奮  
始獲勝殺賊千數任賴捻股乃向安陸西路竄去事聞奉  
旨劉銘傳於尹瀝河之敗進退失機其自請參處本屬咎有應得  
惟誤由鮑超未照約會分路進剿致令劉銘傳駭退挫敗  
鮑超更不得辭咎姑念劉銘傳果敢有素鮑超屢獲大勝  
過不掩功均加恩免其議處道員劉盛藻督隊不力卽著

拔去花翎撤銷勇號仍責令帶隊剿賊以觀後效總兵唐  
殿魁治軍嚴整每戰必先此次力竭捐軀深堪痛惜着照  
提督陣亡例從優賜卹記名總兵田履安總兵銜儘先副  
將李錫增副將胡衡章劉朝煦吳維章候選知縣舉人陳  
元孚均著交部照原銜從優議卹時軍興甚乏張總愚狷  
獷秦省曾公派總兵劉松山編修張錫鏐等軍入關援剿  
各軍接濟皆仰給於公而秦地鮮產稻米麥價亦昂貴且  
有錢無市和糴不行雖經曾公派委丁憂在籍之江蘇候  
補道薛書常商請山西巡撫撥款就地購糧接濟並在陝

州設立糧臺靈寶縣設局采買米麵然山西撥款無多而金陵糧臺支兩軍餉項道遠運多阻而剿賊豫東鄂皖之湘淮兩軍糧餉軍火皆專恃兩江公任江督時以湘勇來路遠人數較少每發全餉淮勇則一年僅發九關恆欠三月糧比增秦餉力益匱公甚憂之乃奏請仿照同治元年浙江米捐減成章程就地勸捐

詔悉如公請秦中各軍米麵始無缺而湘淮前敵餉亦少紓



淮軍平捻記卷四

同治六年正月公補授湖廣總督在營督辦剿匪親督古  
州鎮總兵劉士奇前駐周家口檄調山東臬司潘鼎新駐  
尉氏扶溝公弟昭慶等堵光商賊由鄂竄豫不得出公旋  
奏請鮑超仍留霆營護諸軍及劾樹字各營不救主帥之  
罪皆得

旨行 自去年十一月二十三日公接任

欽差大臣後曾公屢疏以衰病懇辭回兩江本任公以大義相  
勸勉又奉

溫旨勉留曾公乃力疾任事於正月初六日自周家口啟程十五日抵徐公始得於十九日交卸兩江督篆旋奉

上諭湖廣總督著李鴻章補授李瀚章調補江蘇巡撫李鴻章仍著在營督辦剿匪事宜未到任以前湖廣總督著李瀚章署理公疏謝後卽於二月初三日親督古州鎮總兵劉士奇所部奇字馬步八營自徐州起行由歸德至周家口駐紮又檄調山東臬司潘鼎新由濟甯率所部赴豫之尉氏扶溝擇要暫駐時任賴股捻自入鄂後擄脅益衆往來剽忽不常各軍跟追未得扼制痛剿是以賊勢愈熾其初由

京山安陸圖渡襄河欲循商洛入秦爲各軍所扼始復竄  
鄂仍思假道襄樊與秦賊勾合乃淮軍旣四面猝集棗陽  
宜城一帶而霆軍又扼之樊城逆計不得過故於尹澧河  
一戰後更道由安陸竄擾桐柏及信陽北之長台關雙井  
店一帶東犯羅山正月二十八日竄至光山之陳家棚旋  
折竄潑波河是時山西布政司劉秉璋涼州鎮總兵周盛  
波等進軍京山公又令弟昭慶率王永勝董鳳高等由光  
商進兵楊鼎勳由周口馳往光州會剿扼堵北竄捻逆見  
各軍漸逼折由白雀園竄麻城於是鄂皖之境復騷動二

月十四日由廣濟黃梅竄近皖邊適劉秉璋周盛波等統軍由羅田英山馳至太湖迎頭攔擊賊於十六七日由蘄州蘄水回竄十八日鄂軍記名藩司彭毓橘與葛承霖等在蘄水六神港迎剿彭毓橘與葛承霖等陣亡鄂省西北告警公又檄飭劉秉璋周盛波周盛傳等由宿太跟追入鄂兼蔽皖省門戶公弟昭慶已抵六安仍由商固折回入鄂楊鼎勳已抵光州亦由光山入麻城相機攔擊於是捻勢西趨蔓延黃陂黃岡腹地有回竄德安之意鄂省地勢山嶺叢雜賊騎非所便第爲我軍所逼挺而走險且計鄂

省震動淮軍當馳援而彼得乘虛復出豫省西勾秦捻比  
再衝突淮軍預爲之防兜擊未嘗暫緩賊旣不得逞志仍  
竄皖鄂而犯豫之狡謀卒弗衰云初

朝廷以西捻入秦

諭令督率霆軍追剿公以秦地瘠苦多山有劉松山一軍緊躡張  
逆當不致令蔓延而豫中四達之區無一支游擊之師緊  
躡任賴一股恐兩股復合勢更難圖乃與曾公商定疏請  
暫留霆軍凡賊在開封以西及至汝州河陝等處均與之  
縱橫追逐俟任賴一股肅清再行赴陝是時奉

旨以恪靖伯左公宗棠補陝甘總督並督辦陝甘軍務遂從公議至三月中捻股由黃郡西趨公卽檄催霆軍由樊城迎剿適鮑超傷病沉重奏請開缺回籍調養公六次咨催五次函勸其力疾援鄂而超病勢委頓急欲離營調治霆軍其三十餘營戰素得力公乃與曾公等商派宋國永唐仁廉等統營進紮慰令超在營卧護諸將並爲奏請得

旨允行去歲張樹珊在德安楊家河接仗陣亡其所部僅隨身樹宇副營弁勇傷亡百數十人餘均尙完整公因奏劾樹前營記名提督劉克仁與各營官救護不力請將劉克仁革

職發往軍臺記名總兵董大義張勛宋立新吳宏洛王得勝均以參將降補副將董明禮閃鳳來均以游擊降補仍責令留營帶隊分別參劾以肅軍紀又分撥樹字六營交劉銘傳節制調遣其餘三營飭張樹珊之弟張樹屏統帶駐紮周口訓練護衛

旨並如所請行

四月初五日賊自鄂北竄周盛波等敗賊於信陽州邊境賊仍返鄂境任賴股匪由黃州西犯復廣聚鍾祥之曰口京山之尹澧河一帶將由鍾祥回竄隨州時淮軍之援

鄂者公弟昭慶於三月二十一日已抵德安卽帶王永勝  
董鳳高等進扼京山之宋河周盛波劉秉璋亦由太湖宿  
松進蘄黃與楊鼎勛會於麻城之宋埠二十六日進抵雲  
夢劉銘傳亦由信陽馳入鄂境之應山隨州賊於二十七  
日由尹澧河郢東驛洋梓一帶上竄二十五日過安陸府  
璦及流水溝豐樂河等處二十七日至棗陽之宋家集孫  
家集一帶將由襄棗之間復窺豫境淮軍開鳳等營馳紮  
隨州雙河以扼其北竄之路銘軍與善慶馬隊亦卽改向  
桐柏一路探剿四月初一日劉銘傳督軍至游河店時賊



竄厲山一帶邊馬繞至桐柏境之四十里沖初二日賊又折竄黃土關大廟畝邊馬擾及譚家河西雙河等處距信陽州東南四五十里初四日銘軍遂回防信陽初五日進紮西雙河迎頭截擊適周盛波周盛傳等帶隊由應城趨應山初四日自廣水驛出信陽武勝關賊銳欲東竄但防前敵有兵不虞盛軍之躡其後也時任逆大股在台子畝談家河並踞民寨牛賴二逆在西山河李允踞平靖關初五日黎明周盛波率三營由台子畝山左進周盛傳率三營由山右進周壽昌劉啟福由中路進吶喊突前聲震巖

谷賊衆倉皇糾拒我軍槍擊殺數十百人層巒疊嶂中賊騎不能馳驟大半弃騎徒步四竄我軍分路追殺直至談家河任逆越山南竄輜重悉存所佔民寨留悍賊守護官軍攻破之牛賴各股自西山河率衆來援周盛波揮軍迎擊援賊又潰追斬千餘人餘竄入山谷遂令周壽昌劉啟福入南山搜殺賈起勝楊正國入北山搜殺潰賊均向西南狂竄周盛傳率部追至平靖關李允一股橫出迎拒令衛汝貴楊安典等擊卻之盛軍追剿至麻油店始收隊劉啟福正窮追時見黃鞍賊騎越澗飛逃知係逆首賴汶洸

遂策馬緊追冀生擒之爲賴逆從騎回矛刺傷額角啟福負創仍策騎直前踰十餘高嶺至蠟梅山幾及賴逆叢林伏賊暗放洋槍擊中啟福腰腹落馬歿於陣事聞照提督例

賜卹是日斬賊匪二千餘名奪獲騾馬千餘匹陣擒汪老魁陳大狗祝老伏等大小賊酋十八名解散難民甚衆並奪回耕牛二百餘匹分給附近農民初六日劉銘傳追入平靖關逆股經此大創又折南竄入鄂公料捻賊計東豫麥熟欲出掠食雖官軍扼剿而其勢飄忽仍恐由隨棗繞竄桐泌

或由黃麻出皖西因飭令劉銘傳周盛波等由信陽分路入鄂劉秉璋楊鼎勛王永勝等由德安分起北趨應山相機進剿任賴自信陽敗遁卽於是日竄過應山縣城東北適公弟昭慶所遣南贛鎮總兵王永勝徐州鎮總兵董鳳高帶開鳳各營由隨州赴應山探剿與之遇董鳳高率吳鳳柱馬隊迎剿城北斃賊數名生擒一名奪馬三匹賊大隊踵至我軍因壘卽守王永勝等帶馬隊抄擊又斃賊數十名生擒擒首范守由及從賊五名奪馬十餘匹賊敗退九十里外初六日黎明王永勝董鳳高派六成隊進剿賊

卽全股向東南奔竄我軍奮追四十里申刻至李店賊分  
股迎敵我軍嚴陣以待鎗礮齊施副將陳福先衝敵而入  
刃悍賊數十人中槍陣亡我軍戰益力馬步大隊至如潮  
湧賊大潰竄去追十餘里斃賊百數十人奪獲騾馬十餘  
匹時已昏暮收隊回駐李家集賊敗後夜竄孝感之小河  
溪適山西布政使劉秉璋蘇松鎮總兵楊鼎勛帶隊由應  
山之廣水驛向東搜剿初七日賊衆自小河溪奔竄黃安  
之河口鎮劉秉璋與楊鼎勛追抵小河溪公弟昭慶由德  
安亦至飛調王永勝董鳳高改由南路赴花園兜剿時捻

股屯踞河口上下長山寨一帶劉秉璋等率隊直前初九日至黃家橋賊已整隊迎敵助營副將李占彪匹馬陷陣楊鼎助督正副兩營馳之賊紛紛敗退劉秉璋飭左路各營進擊賊卽越山而逃是晚賊酋胡連發率二十餘騎來降初十日我軍進至長山寨賊馬步大股迎拒各營鎗礮連環轟擊自辰至午相持數時副將高森茂先登弁勇齊進賊陣潰亂擒斬甚多奪馬騾四百餘匹賊復退踞河口是夜遁去十一日劉秉璋等拔隊緊追楊鼎助帶所部八營先行已刻至王家田忽山內伏賊馬步七八千人覲我

軍頭隊已過突出邀截總兵張遵道力戰死之楊鼎勛飭各營結方陣包裹輜重短兵相接弁勇頗有傷亡劉秉璋聞報馳遣吳長慶況文榜往援各殊死戰賊敗竄向宋埠四月十二日劉銘傳率各營逆擊擒賊於黃安大敗之賊犯皖之計不成仍折回安陸境是月公以餉匱奏催山東協濟徐州糧台之款銘軍自初七日抵應山知賊竄河口恐其乘虛由黃州下竄安慶則瀕江腹地俱危卽於初十日馳至黃陂十二日自紫潼河向北攔截行五十餘里至黃安紫屏舖遇賊整隊待之賊馬步大股正向東走忽遇

官軍隔河排紮馬賊千餘竟過河繞我軍之後銘傳派遣  
員丁壽昌分隊護守輜重令劉盛藻一軍由左路擊賊步  
隊副都統善慶馬隊助之滕學義四營並樹軍三營由右  
路抄賊後陳振邦馬隊助之劉銘傳自率親兵及黃桂蘭  
五營由中路迎擊賊見我分路出剿亦分路來撲馬賊先  
經劉朝幹擊敗退過河西劉盛藻督隊過河賴逆率衆迎  
拒馮汝霖丁汝昌擊敗之任逆見賴股西潰卽率馬步悍  
賊數千直犯滕學義及樹軍隊伍指派牛逆一股迎撲左  
路賴逆復回拒中路另出馬賊數百繞撲我後馬隊營官



陳鳳樓王保勝率部搏戰四五合戈矛相及彼此不分步  
賊繼進董大義等率隊猛衝我軍鎗礮如雨斃賊滿地賊  
猶持矛死鬪滕學義等抄出賊旁賊始大敗各軍乘勝進  
追敗逆皆踰山越嶺相率狂奔我軍分路擒殺數千奪獲  
騾馬千餘匹沿途解散難民萬餘人追三十餘里至陡山  
收隊昭慶正帶隊進分水嶺忽賊大股自東回竄行走甚  
疾昭慶督鳳字武毅十二營迎頭鏖戰賊整隊抵拒王有  
明以炸礮擊潰賊馬副都統溫德勒克西等帶馬隊迎擊  
步隊各營排進轟擊賊乃奔潰擒殺數百奪獲槍械馬匹

無數王永勝帶開字十營在後路遇賊倉猝迎敵賊以全力抄撲王永勝督廖德旺楊正清等直衝賊陣傷悍賊多名弁勇亦有傷亡各營併力齊進斃賊數百賊衆奪路向西逃竄復擒七十餘人奪馬六十餘匹救出難民千餘人生獲賊首潘石頭蔡大義等時捻逆畏兵遠避仍折回安陸臼口一帶初任賴捻股在鄂中屢勝之後勢甚猖獗此次由黃安東趨卽欲由黃州廣濟下竄皖豫經各軍分路截擊劉銘傳攔頭痛剿始折而西竄臼口天門等處捷聞得

旨銘軍營官降補參將董大義吳宏洛著以副將儘先補用降補  
游擊董明禮閃鳳來均著以參將儘先補用並加副將銜  
已革提督劉克仁著暫緩發遣軍臺留營協剿以觀後效  
其陣亡之勛字營記名總兵張遵道副將李占彪高森茂  
開字營副將銜陳福先副將銜儘先參將李洪貴儘先參  
將謝元勛游擊孫雲標升用知縣龔汝弼提舉銜候選縣  
丞廖得琦都司趙貴生千總蕭東江范顯慶外委吳永年  
均優卹如例先是淮軍各營餉項向有山東月協餉銀五  
萬兩內給山東布政使潘鼎新所部鼎字營餉銀三萬二

千兩徐州糧臺銀一萬八千兩徐州糧臺者自咸豐三年  
軍興以來兩江總督以江甯淪陷徐州相距較遠派徐州  
道設立以支前敵者也其收支各款向歸徐州道專案造  
報由南河總督覆核請銷同治三年江甯克復軍務稍鬆  
經漕臣奏改爲善後局仍由徐道收支造報別爲一家事  
多浮冒同治四年曾公奉

命督師駐徐後設立徐州行營糧臺支放湘淮軍餉及儲運米糧  
軍械等項亦派徐州道經理至公督辦軍務裁汰徐防馬  
步兵勇仿湘淮各軍營制另募設立交徐州鎮總兵董鳳

高統帶并爲奏添豫東晉三省協餉以濟兵食嗣以徐防兵勇旣與湘淮各軍合則餉項不應分析徐州旣另設糧臺則善後局不應管餉遂於本年正月內奏明將徐防軍餉歸併徐州行營糧臺由善後局支放所有地漕釐捐湖租及各省協餉統歸徐道提解糧臺照章收支此徐州糧臺山東協欵之所由來也自後除扣給鼎字營月餉三萬二千兩外徐州餉銀每遲至數月始行報解公以是時淮勇各軍轉戰豫東皖鄂等省窮年累月遠道奔波而留守東境運河尙有淮軍水陸四千餘人卽協欵如期報解轉

運尙復需時若任意逾期緩不濟急昔年僧邸督師時各  
省兵餉皆奉

旨隨便調用山東除月供巨款外一切麩麩草料軍需捐項均收  
給之此外則晉豫亦多協助曾公於四年四月奉

命北征亦經戶部奏明向協僧營之款諭令按月撥解及至此時  
僅每月解一萬八千兩尙且愈宕愈遲且晉豫正捻股覬  
覷之地各有爲難若東省則財賦完善旣不能出兵助剿  
又不肯出餉助兵而淮軍每於東省戒嚴常以全力赴援  
東省更無畛域之理各情形據實奏陳報可

五月十二日擒賊東竄至山東濟甯之戴廟東師潰連防  
不守 擒賊自四月十二日之敗日夜圖出鄂境十四日  
擾孝感銘軍緊追而至賊竄雲夢應城白口天門等處時  
天久不雨湖河盡涸各軍人馬轉戰疲憊無水不足以限  
賊公慮挺鹿之走卽急檄霆軍至鄂分屯要阨以防西竄  
并令銘軍踵躡其後十五日陳振邦派降將任永清哨官  
鄧長安馬金敘先率馬勇百餘名追賊雲夢乘夜進擊生  
擒賊首陳大貴一名斃賊數十奪騾馬三十餘匹賊不得  
喘息走阜市十七至十九日折回京山由鄂東洋梓上竄

沿途饑散甚多靈軍營務處宋國永等由隨州回軍西向  
十九日抵棗陽之吳家店賊由宋家集竄平林店團山一  
帶相距二三十里二十日宋國永商令記名提督唐仁廉  
率隊夜襲團山賊館斬擒賊先鋒悍逆數百名奪獲騾馬  
二百餘匹二十三等日賊由宋家集竄至新野東南之  
朱集水臺南陽西南之清華穰東等處邊馬擾及鎮平鄧  
州境內公以豫境平曠四達賊情剽譎異常目下既至南  
陽郡境不東走葉裕卽西趨內浙秦豫皆不可不防乃檄  
劉銘傳由棗陽緊追出鄂周盛波由信陽馳扼泌陽皆令



視賊所向相機兜剿又令潘鼎新劉士奇兩軍會合迎截以蔽東路時豫東新麥登場動賊窺伺二十五六七等日賊由南陽西竄鄧州鎮平內鄉各境破民寨細載場麥沿途擄糧駸駸有由淅川荆子關入陝之勢適豫軍由南陽進擊而銘軍山聚陽襄陽緊躡其後二十八日亦追抵鄧州二十九日四鼓銘傳督隊馳四五十里賊時踞趙家集等處聞風卽棄館向東北疾走副都統善慶副將陳振邦馬隊追及之於白龍廟任逆分路回撲我軍擊敗之擒斬賊首李紅山朱五等並騎賊數十名奪獲騾馬百餘匹步

隊相繼而進賊遂狂奔我軍追二十餘里至鎮平縣之馬莊賊復繞向東南竄去五月初一日賊至唐裕之交周盛波周盛傳由泌陽進剿及於唐縣又敗之賊折而北竄初二三日肆擾舞葉臨潁之交初四日過許州西北豫軍張曜攔截之初五六日竄洧川尉氏中牟一帶鼎軍適駐尉氏之張市出隊邀截賊折而北趨初七日由朱仙鎮畧及陳留蘭考初八日卽入山東曹縣境內日夜馳數百里勢如飈發初九初十等日定陶城武徧地賊氛十一日犯鉅野時淮軍全師赴鄆追賊之出各營皆落後銘軍尙能與

賊馳逐而東自應山黃陂西出安陸襄棗間又山南陽跟  
剽至鄭汴數月以來幾於無日不追奔逐北賊雖望風奔  
逃而軍士冒暑力馳亦疲不可用賊勢遂熾初曾公督師  
剿捻因湘淮軍中素少騎隊而步卒笨重不能制賊衝突  
乃議於東省之運河東岸豫省之賈魯河沙河西岸沿堤  
興築長牆圈賊豫省長牆已於五年八月間爲賊竄破而  
運隄則屹然巨防賊屢攻未陷東省賴以完固其分汛則  
濟甯以北東軍守之台莊以南湘淮各軍守之其濟甯台  
莊之間則以湘軍水師淮軍陸師補其闕白曾公創制追

公接任督師畫一不改任賴等股遠竄鄂中距運防已遠  
戍卒多懈東軍所主自黃河以南申家口戴廟至濟甯石  
佛寺趙村不及二百里以守則若有餘會天旱水涸運河  
往往成乾溝人馬可行公以南陽湖一帶雖有水師徐道  
奎一營而河乾無水力不得扼慮運防有失乃飛檄潘鼎  
新緊躡賊後策應運防又調昭通鎮總兵沈宏富統奇字  
八營由虞城移紮豐縣聯絡聲勢並咨商山東巡撫布置  
防扼十二日任逆以鄆城梁山寨有上匪勾引裝旗起事  
卽於是日由梁山襲脅烏合直犯戴廟午刻東師不守賊

馬衝過運河東岸長塙毀搶東軍統領總兵王心安等營  
軍械咸盡並擄船以濟全隊東省水師總兵趙三元亦不  
能抗是日潘鼎新劉銘傳馳抵單縣相距僅一日程云

淮軍平捻記卷五

六月公率親軍移歸德再移濟甯調淮軍全營赴東省防堵運堤及膠萊河 自五月十二日賊渡運河東省紛紛告警公因賊勢趨東卽奏請由周口移駐歸德就近調度於十八日夜督帶親軍馬步隊冒雨啟行二十二日馳抵歸德時賊已竄擾泰安潘鼎新由單縣兩晝夜馳抵濟甯添備糧藥卽由滋陽曲阜向泰安追剿銘軍於十七日亦由單縣堤上馳赴濟甯於是運防東軍盡爲東省撤回腹地與賊角逐公恐賊乘虛回竄飛檄周盛波周盛傳等由

曹縣拔往濟甯之長溝擇要扼堵又恐賊由泰安折竄沂海則清江裏下河門戶可虞復調王永勝開字營沈宏富奇字營赴宿遷駐紮董鳳高鳳字營孔昭右華字營併扼韓庄要隘以備南路劉秉璋及公弟昭慶由鄂馳回令秉璋赴濟甯休士待戰昭慶赴徐州宿遷防剿時賊分兩股一竄甯陽一竄萊蕪青石關等處其勢漸向青州一路欲趨登萊劉銘傳潘鼎新因建倒守運防進扼膠萊蹙之海隅制賊奔竄之議公建之六月初一日飭銘傳一軍由濟甯向泰安萊蕪徑趨青州爲中路潘鼎新一軍由濰縣昌

邑赴萊州爲北路又派徐州鎮董鳳高昭通鎮沈宏富馬步十五營由郟城蘭山進莒州爲南路三路兜截而前以期逼入登萊會合東軍相機扼堵旋具疏陳略言賊竄登萊我軍卽於膠萊咽喉設法兜逼使北不至竄入畿疆南不得蔓延淮海局勢自較緊湊奏入

俞允嗣奉

旨命公移駐東境公乃由歸德啟程抵濟甯於時運河之防則有河南巡撫派張曜宋慶兩軍分紮東平以上靳口至黃河沈家口百餘里周盛波分紮開河至靳口一帶劉秉璋分



紮濟甯至開河一帶楊鼎勛分紮趙村石佛寺至南陽湖  
一帶安徽巡撫英公翰派黃秉鈞統英字一軍赴宿遷向  
上游扼紮張得勝凱字一軍赴貓兒窩灘上向下游扼紮  
程文炳強字一軍居中策應並調水師三營入運巡護公  
又令昭慶督所部由灘上黃林莊接守至韓莊八閘一帶  
各軍皆先後到防興築堤牆炎風烈日之中弁勇晝夜工  
作士氣甚爲奮發又奉

諭以防剿機宜間不容髮令卽星夜馳赴前敵就近調度以期呼  
應靈通公卽疏陳曰自來流賊最難追剿而流賊之速尤

莫如今日之捻逆中原平曠萬騎衝突無可限制日輒百數十里或二百里無論我軍步隊笨滯力不相及即使及賊見仗而此截彼竄橫行側出賊路不窮我力必有時而窮迨日久追逐疲憊爲賊所乘往往一蹶不振自剿捻以來十數年如一轍雖追賊神速如僧格林沁尙且不能成功臣等自問萬不能及故欲滅此賊計惟有兜圍之一法臣曾屢奏及之曾國藩始思變計初議四鎮之設繼議沙河賈魯河之守本年春間左宗棠曾國荃又擬爲日口之圍皆欲偪之不流蹙之漸緊也自臣受事抵豫賊已入鄂

各軍與賊轉戰鄂豫數月迄無機勢可乘惟有嚴檄諸軍  
往來躡擊迨賊由豫竄東臣思東省運防屢經賊撲向稱  
可恃遂急注意布扼曹單豐碭舊河堤欲困之黃運之間  
以爲得地乃不數日而賊已渡運臣由歸德馳赴濟甯與  
劉銘傳等面商不得已復爲蹙賊登萊之計先借各省兵  
力協守運河西堤以圖圈制而遏回竄續奉六月初五日  
寄

諭抄發劉長佑英翰等原摺皆言之甚切與臣所部署均屬相符  
是目前辦賊捨此更無良策臣更衡量利害之輕重與其

馳逐終年流毒江皖東豫楚各省不如棄一隅以誘之與其往復運東濟泰兗沂青及蘇之徐淮海各屬均受其害不如專棄登萊以扼之膠萊河之守不密則登萊無可扼運河之守不密則膠萊仍不足恃賊踪已向膠東事勢至此機會可圖但求萬全不爭一日故臣立意必運堤與膠萊河兩防均已布定乃可抽兵進剿庶打一仗是一仗滅一賊少一賊賊智自困而兵力不疲明知此計至愚至拙亦至難然不若此更不足以制賊疊經緘商丁寶楨屬其勿遽窮追反驅出境卽兵力未集而迫之過緊使之窺破

機關轉虞脫逸並告以蹙之一字宜求實濟勿尙虛功恭  
讀六月初四日寄

諭令丁寶楨宜妥籌兼顧杜賊回竄不可專事尾追致賊蔓延尤  
服

聖謨之洞照臣惟日夜圖維先固守局而後進兵此臣籌辦之大  
致也東蘇兩境運堤袤長千里苟非各督撫關顧大局通力  
合作臣軍斷不敷用皖豫派到各軍與淮軍分守宿遷  
以上地段臣前奏明現今於兩岸排築長牆分哨過運東  
就舊牆修繕礮臺犄角護守方在漏夜興工非月餘不能

牢固而宿遷以下至清江堤幾二百里尙無守兵漕臣張之萬兵力止能自保蘇省防軍無可再調臣僅調前金門鎮王鍾華提督李洪達水師三營分布宿遷亨濟閘下至鹽河簕口壩一帶但苦無陸師依護復經函商浙江撫臣馬新貽請其速派五千人北上協守宿遷桃源運堤以補其隙尙未接復疊准李瀚章曾國荃咨稱已派提督譚仁芳總兵劉維楨率萬二千人劉長佑咨稱已派臬司張樹聲帥總兵余承恩等四五百人前來助守均尙未得啟程日期故運防尙未布滿卽暫無兵替入膠萊至膠萊河距

南北海口潘鼎新函稱二百七十里丁寶楨則云約三百里以每營三里計之須百營布守至少亦須八十營劉銘傳等三路之師日內先後已到然步隊止四十六營臣復擬調豫軍宋慶十二營淮軍王永勝開字十營出運河續行抽往必合之丁寶楨所部東軍三十一營始可密布丁寶楨止允以十一營相助而臣添調運防之宋王兩軍又須牆工稍整乃可拔隊若丁寶楨盡以東軍協守目前略可敷用未知果否准行連日據報賊蹤盤旋萊陽掖縣仍向東北駛竄臣飭劉銘傳等如賊外向當設法堵入並

商請丁寶楨移營分扼若膠萊之守未成卽不能銳意擊賊若賊或竄出膠萊諸將必能跟踪急追臣雖庸懦前剿辦江蘇粵逆凡遇堅城要地每多親往督攻蓋剿守賊與辦流賊情事本自不同況此時運防各軍已到築牆紮營旣須就近督飭布置而直隸湖北浙江之未到者尙有二萬餘人沿途催趲照應及將來調派抽替皆臣所當主持皆須在濟甯居中籌辦若遽舍之前進則五省客兵何所稟承運防門戶未屬膠萊咽喉未斷臣卽親往尙無裨益而於大局轉有妨碍兵事百變臣誠不敢謂運防旣成滅



賊必有把握然立意已定則經營尤須盡善此臣暫難卽  
赴前敵之實情也伏讀初五日寄

諭應否揀派威望素著大員統領前敵諸軍以一進止之處著該  
大臣酌量辦理臣部湘淮各將久其戰陣素相輯睦號令  
尙無不齊此次派兵入東臣因直隸提督劉銘傳深達機  
要與潘鼎新同建倒守運河進扼膠萊之議曾令該提督  
就近察酌前敵情形妥籌調派隨時會商丁寶楨協同東  
軍籌辦膠萊一帶扼剿事宜但使諸將力所能勉臣固曠  
交催當不致誤一俟各省調兵到齊運河膠萊兩防部署

略定臣再抽選勁旅移營前往督飭進擊以期聚殲總之此時大局先圖兜困此賊不求一時戰功臣若令劉銘傳潘鼎新等追進登萊計亦可獲小勝驅之使出惟念捻逆流竄多年數省生靈塗炭實貽

聖主宵旰之憂及今地力人力幸有可辦之機惟辦理須有次第臣何敢避迂緩之名而不竭力經營顧彼失此貽誤全局疏入報可時銘軍於十三日已抵平度州之瓦廟口鼎軍於十二日移駐掖縣之新河口而任賴股逆於初九初十日由萊陽北趨招遠黃縣境內賊股全趨海遼設守膠萊

河之議乃益堅膠萊河者元至元十九年所開之新河通運漕以避海道成山之險者也其水橫亘南北首尾皆有口通海南口曰麻灣北口曰海倉海倉以南卽曰新河延袤二百八十餘里形勢足可防守惟萊州海倉口以外有沙灘七十里沙水沮洳不能築牆而水淺人馬皆能逕渡由新河迤西三十里許有濰河其入海處水勢較深潘鼎新擬捨膠萊河海倉口外之數十里不守而從新河西平地築牆橫紮至濰河東岸復就濰河築牆以瀕於海公乃與山東巡撫丁公寶楨議定自新河南紮至大成寺一

百一十里令劉銘傳全軍守之自大成寺至吳家閘一帶約六十里令董鳳高沈宏富兩軍守之自吳家閘至麻灣口約八十里東軍守之俱於西岸增修長牆自新河至濰河東岸潘鼎新守之其濰河西自夏店至海口水深泥淖亦屬東軍分守以補其隙又調豫軍宋慶帶毅字十二營王永勝帶開字十營由運防馳赴膠萊河會同劉銘傳相機策應其東平宿遷兩防暫令豫軍張曜淮軍李昭慶勻紮替守以固運防公於二十二日卽親歷東境運河上下銘鼎奇鳳四軍與東軍所修膠萊河牆亦於六月下旬冒

暑雨趕築就竣七月初三日豫軍宋慶到防填紮新河至楊家園初八日淮軍王永勝亦到防填紮吳家口一帶惟濰河西辛安莊北至海尙空五六十里潘鼎新劉銘傳暫派馬隊六營沿河巡哨擬使王永勝回顧運防騰出王成謙一軍至膠萊扼紮又檄提督傅振邦率所部千二百人馳赴濰西勸集團練協力堵剿是時賊已深入海曲故膠萊守禦得漸就緒而自新河南至塔埠口二百六十里其中淤淺處頗多自新河橫出濰河北至下營又五十餘里加之南北海口沙灘在在須籌布置完固防守必須兵五

萬餘人分路進戰又須三四萬人而各路之師尙不足五萬人公於此時之經營亦心力交瘁矣

七月二十日捻逆全股由海神廟撲度濰河膠萊防潰賊又南趨 初捻股於六月十一二日仍游奕福山甯海一帶聞我軍扼紮膠萊河卽疾馳回竄七月初一日由卽墨撲麻灣一帶東軍汎地丁公寶楨督東軍進擊敗之遂折竄平度卽墨交界距淮軍汎地三四十里往來窺伺銘軍過河巡徼賊不敢近初七日又犯鼎軍所防新河一帶初八九日竄萊州附近時王永勝一軍已紮防運隄東軍王

成謙所部於十三日到防卽紮守濰河西岸接潘鼎新守地北至下營三十六里下營以北沙灘最淺者尙有魚里舖至海神廟十餘里王成謙商派原紮辛安莊之東軍已革總兵王心安平字四營往守王旣到防銘軍巡哨馬隊遂撤是時賊知我軍將蹙之海濫以圖聚殲乃爲困獸之鬪十六日五鼓賊馬步大隊猛撲豫軍宋慶所守新河地段捨死衝突游擊蔣尙鈞千總程允和抽守牆勇四百人繞賊後夾擊斃賊甚多生擒毫捻老賊三十餘人奪獲騾馬四五百匹追奔二十餘里賊旋向萊州西北竄走任賴

諸逆知膠萊河二百餘里牆堅濠深守禦嚴密無懈可乘  
於是有圖渡濰河之舉又濰河西岸本爲鼎軍二營東軍  
王心安四營分守嗣東軍王成謙常武十營到防王成謙  
利王心安已成營牆卽商令王心安移紮下營以北至海  
口一段自以八營填紮王心安四營原防地段故下營至  
海口最要之地王心安僅以四營守之營壘初成河牆未  
築賊諜知情實乃於二十日辰刻全股由海神廟以北十  
數里外海灘撲渡濰河王心安營潰營官胡祖勝哨弁七  
八員勇丁六七百名同時陣亡王心安獨跳身遁王成謙



亦不敢救賊遂一擁過河鼎軍距失事汎地四十餘里聞  
信卽督隊邀擊斃賊數百時賊已漏網急向西南奔竄二  
十一二日銘字鼎字各營及董鳳高王永勝沈宏富先後  
得信均拔全隊緊躡而西追至濰縣賊竄昌樂東南二十  
三日分股由安邱臨朐南竄侵有南犯沂莒海沭清口之  
意於是膠萊之防又潰事聞奉

旨道員王成謙革職留營自效自曾公與公督師剿捻始變窮追  
之師爲堵截之計咸屢疏欲歷之山深水複之區棄地以  
圖聚殲皆主明孫傳庭之論謂須驅之於必困之途取之

於垂死之日識者以爲平捻之策莫善於是而置吏各以  
全境保民爲功往往諉剿賊爲督師之責初不便之比圍  
合則客主之軍號令不一是以一潰賈魯河沙河再潰運  
防三潰膠萊轉輸半天下士卒傷夷塗地於是權奇壯佼  
之士莫不扼腕太息而志未堅識未定者幾思還計而改  
爲蓋成敗之局岌岌不可終日矣天祐

**靈祚挺**生偉人誠貫金石百挫不改終輯寇盜以綏我民非始知  
之難而終守之難嗚呼鑠矣

七月二十六日公由濟甯至濟南得膠萊敗狀疾馳赴臺

莊回顧運防是日董鳳高追敗賊於莒州 當膠萊河事  
之初興也公慮兵力不齊賊蹤飄忽膠萊防局難成必先  
嚴運河之守杜捻賊回竄之路故雖進軍膠萊而一面仍  
督飭扼守運堤各軍皆輪替進剿七月十九日鄂軍譚仁  
芳劉維楨等始到運防公令接替靳口至亨濟間防務抽  
調劉秉璋周盛波兩軍東向膠萊公親於二十二日由濟  
甯州督隊進發二十六日馳抵濟南而膠萊失守之報至  
於時運防自韓莊以下公弟昭慶以十九營守之汎地長  
一百七十里宿遷仰化集下至桃源僅有水師往來校織

視全防兵力爲最單公旣聞警立飭劉秉璋周盛波分兵  
由濟南改道逕赴泰安沂州攔剿又檄董鳳高王永勝各  
帶所部由沂州馳回臺莊灘上一帶協防劉銘傳統率大  
隊緊躡賊後朱慶一軍折回運堤原防地段仍酌派精銳  
以備游擊汶上東平等處公又慮南路空虛飛調周盛波  
周盛傳部下由郟城邳州躡進剿潘鼎新由嶧縣臺莊  
並進邳宿一帶而親督劉秉璋沈宏富溫德勒克西馬德  
順等馬步隊進駐東省與江蘇交界沿運之臺莊居中調  
度咨商東撫派王成謙王正起等軍扼紮莒沂要隘之十

字路丁公亦自帶楊飛熊軍十營駐沂堵賊犯運時賊南竄董鳳高率馬步七營追之二十六日及於莒州卽帶隊抄前時秫黍正盛一望蔽野鳳高伏馬隊於秫叢中步隊列陣以待未幾賊騎蜂擁來犯我軍俟近開槍擊之賊墜馬者甚衆步賊猶繼進我軍僞遁誘入秫叢馬隊伏起裹賊賊不得相顧自相踐蹈死者不可勝數其悍賊奮力竄出向西遁我軍追殺十餘里擒斬百餘名始收隊回莒次日黎明分路進躡甫過莒州南門有馬賊百餘騎西來我軍分隊迎擊步賊倏四面至總兵魏興慶開放劈山砲斃

賊數十槍礮隊環繚而進營官董學友孫文科王芝生等奮戰呼聲動天地軍士無不一當百吳鳳柱又帶馬隊橫擊賊腰董鳳高親督血戰前卻數十厯兩時之久賊散而復聚有騎馬賊酋數十督陣不退手大旗揮賊進拒故賊尸枕藉仍抵死不退王芝生乃突入其陣斫三賊咸仆之奪其大旗餘酋驚遁賊遂奔潰我軍追殺二十餘里又斃賊數百生擒一百三十餘名奪馬三百餘匹槍礮牛驢無數數百我軍陣亡弁勇二十八名受傷四十餘名事聞陣亡之儘先都司駱得彪守備宋朝喜千總黃正科外委孫

元均奉

旨優恤如例

八月十一日公督隊抵台莊布置運防朝議疑膠萊旣潰  
運防亦不可守寄

諭詢問公覆疏堅持之又陳採辦軍食情形皆得

俞旨 董鳳高敗賊莒州後遵檄回赴運防八月初六日抵汎接  
守猫兒窩至灘上三十里公弟昭慶移守韓莊至黃林莊  
以下王永勝亦至邳州之官河夾護運防上下游擊十一  
日公抵臺莊以宿遷仰化集下至清河尙無陸軍駐扼遂

派襄辦軍務山西布政司劉秉璋率所部及沈宏富奇宇  
七營由臺莊渡河馳赴桃源會合浙軍聯紮至清河以上  
時膠萊防潰

朝廷甚慮運防難以堵截

諭旨詢問公覆陳曰從前議守運河原恐膠萊之防倉猝難成畫  
遠圈以扼歸路所集皖豫鄂各軍皆以守本境者移守外  
戶能守固有裨大局卽不可守尅日回援計固兩便而臣  
軍全係步隊迎剿數省奔逐數年功效毫無精力實甚疲  
憊無論賊竄何處責望悉歸於微臣軍士必苦相驅迫勞



怨不支勢且潰決臣日夜憂之諸將稍懷忠義者皆力勸就地圍賊使其竄地較狹追剿較近我得藉屯守以更番休息賊或限方隅而漸有窮期以是曾國藩創守賈魯沙河與運東臣又議守膠萊河與運西皆萬不得已相機勢而爲之非謂遂有把握也自去歲豫軍疎於汴南今則齊軍一疎於戴廟再疎於濰西人力不齊前功盡棄膠萊河防三百餘里尙不可靠沿運千里調兵數省敢自謂可恃乎然反覆籌思賊正急欲出運萬一力堵不住亦勝負之偶然若先撤運防是示賊以弱也守運各軍早夜修防尙

無疲倦較窮年追逐者勞逸飢飽略殊忽令守忽又令不  
守軍心能無惶惑運河東南北三面賊氛來往竄擾官軍  
分路兜逐地方必受蹂躪然不過數府州之地驅過連西  
則數省流毒無窮同是疆土同是赤子亦未便歧視也今  
使罷運防而另有制賊之法臣必速罷若更無可制賊似  
不若得守且守能戰卽戰盡人力以待事機如因地段寬  
遠疎漏致賊逸出或冬令水涸冰凍慮生他變再行相機  
變通辦理賊無常勢兵無定形以臣才力兵力竭蹶之狀  
辦此流賊尤不敢懸擬成局容隨時察度賊情會商曾國

藩暨各督撫妥慎籌奪奏

聞報可初曾公以淮軍向食大米於創設四鎮時卽飭每處皆就河道辦運以濟軍食嗣游擊東豫無米之處皆就地採辦麵穀充飢由各統領行文地方官代向民戶照時價采買應用往往追賊緊急因繞赴城鎮辦糧致落賊後然特遲緩一二日猶不致缺誤今夏賊過運河各營驚追公憂糧食不繼飭經過州縣預購由營照市給價取用又慮行營攜銀不足令軍中具收到糧食印領交地方官申送糧臺領銀仍扣本軍之餉乃銘鼎兩軍前赴膠萊沿途州縣卽

有閉城不應者比膠萊軍南下各城鎮皆遏糶銘軍至郯城營中斷糧至三日之久勇丁日逐賊隊而行值秋雨連綿道路泥濘饑疲交踵偃仆相望公深以爲憂咨商東省當事令各地方官預提公欵若干購存麥麪小米各若干石以便追軍過境給價採用復具奏陳之奉

旨地方官於客軍過境倘延不付給糧米許卽查參於是軍行始漸免枵腹之患

八月初八等日銘軍逐賊郯城沭陽間勝之十五日後賊犯宿遷運防不得逞由邳州北竄是月公覆陳馬隊情形

賊自莒州被創後乃間道逾流河由古墩山竄及日照  
贛榆境內循海而南將窺海流適銘軍尾追而至八月初  
八日我軍馳抵贛榆之沙河鎮又行二十餘里遇賊大股  
沿佳穀南來善慶陳振邦馬隊抄前擊之擒斬數十名賊  
抱隊且拒且走善慶陳振邦追至顏家莊賊抵死回拒善  
慶等戰稍卻唐定奎黃桂蘭步隊繼進步賊亦分隊相抗  
馬賊復橫截我後丁壽昌率礮隊至視賊所向連放炸礮  
火箭斃賊多人賊始不敢南竄折向西遁西卽郟城境也  
時賊騎見銘軍旗幟每避走初十日銘軍追抵郟城賊南

奔紅花埠十二日竄流陽城西新河一帶我軍皆躡之而前十三日甫過殷坪見賊騎縱橫於道殷坪前有黃泥河水勢陡漲河上僅一橋通往來賊隊先已過橋任逆獨率步賊千餘殿見我軍追至親堵橋口銘傳飛調礮隊前擊斃賊百餘人棄橋潰劉朝幹等五營追過橋截擊賊之輜重獲之賊渡沙河南奔是夜各營皆搭造浮橋次日黎明銘傳率馬步過河行十餘里見賊騎紛走遂令陳振邦衝擊善慶接應賊不敢回顧棄老弱而奔善慶等乘勢擊斬俘獲甚多緊追不舍任逆乃率衆回拒意欲死鬪銘傳令

黃桂蘭唐定奎由西岸進自統劉盛藻親軍繼入善慶等  
爲騎賊所裹步賊又蠶擁來犯戰酣未決適銘傳率大隊  
至乃揮令步隊槍礮環轟而進賊猶抵死不退黃桂蘭督  
劉克仁吳宏洛張士元等執長矛衝入悍賊皆以短兵迎  
戰格鬪兩時許唐定奎又率滕學義等大呼陷陣賊之最  
悍者爲礮傷矛刺略盡始紛紛潰敗時賊之大股犯沅陽  
縣城攻撲甚急銘軍旣破賊馳抵沅陽城南城圍立解是  
役也我軍僅傷亡數十人生擒領白旗左隊逆首蔡有城  
一名俘獲三百餘名槍斃及落水死者無慮千數奪獲器

械騾馬甚多十五日以後賊遂西走宿遷對岸圖撲運防  
及六塘河經皖軍及漕督防兵分堵皆未得逞二十日賊  
據宿遷之程寨劉銘傳與潘鼎新周盛波各軍冒雨進躡  
抄擊賊館數處擒斬數十人捻衆因由窑灣邳州北遁時  
陰雨連旬路途流潦縱橫軍士皆裹糧轉戰於泥淖中或  
糧盡待購卽不能不少阻而賊輒亡命無所顧以是追及  
輒相失二十二日奉寄

諭曾國藩李鴻章歷次奏請採買戰馬不下八千餘匹駝隻幾及  
千匹現在存營究有若干僧格林沁所部馬隊除裁撤外



現在存營馬隊官兵並馬匹數目若干將領出色者若干員均著李鴻章查明迅速覆奏公卽具疏略陳曰查曾國藩與臣厯次派員出口採辦戰馬隨時陸續發交各營募練馬勇惟鮑超劉銘傳兩軍馬隊較多鮑超馬隊十二營經曾國藩奏明裁撤令提督唐仁廉挑選膽壯馬八百匹帶赴臣營頃已編立仁字三營交其訓練協剿劉銘傳所部吉林黑龍江馬隊官兵共七百十五名並馬勇二營係副都統善慶統帶又馬勇五營係副將陳振邦統帶此外劉秉璋潘鼎新周盛波等各有馬勇二三營不等李昭慶

所統馬勇四營現隨臣行營操練臣逐細察度剿擒必要  
馬隊得力而捻極狡悍動以萬騎夾數萬步團拚死包裹  
彼旣馬步並進我亦須馬步相依立腳才穩專用步隊則  
馳驟不速專用馬隊則出入太大逆首任化邦卽任柱馬  
賊死黨最多僧格林沁初專以馬隊剿捻極利晚年騎將  
不甚得力而賊鋒過銳亦賴步隊相依蓋十餘年慣戰之  
賊不比新起股匪也臣等以南人練馬隊本非素習又少  
騎將經營兩年愧無成效現維劉銘傳騎卒較多尙可與  
賊搏逐然亦難操必勝其餘步隊出剿須有馬隊探護躡

追昨方緘商曾國藩廣籌餉源再議添調或俟運防得罷酌裁守軍騰出添練馬隊之餉至馬匹到南隨營游擊疾症易生麩料難購動輒倒斃仍須隨時購補各營駝隻運解輜重自冬徂夏奔馳楚豫東各省亦多病斃俟飭查現存數目再行具陳至僧格林沁所部馬隊除迭次遣撤外現止吉林黑龍江黃旗馬隊三百二十員名又已革漢軍正黃旗副都統溫德勒克西所帶察哈爾頭二起馬隊係僧格林沁殉難後始行調到現止三百九十餘員名隨臣差遣馬匹不足亦待新購口馬到時酌補再令出剿此外

僧格林沁所部並無餘存亦無另有將領出色之員云云  
疏入報聞